

**Jedinica
OSBiH
spremna za
Afganistan**

Danci odlučuju o datumu odlaska

● Naših 45 vojnika neće prije oktobra otići u misiju ISAF ● Pokrajina Helmand, gdje će čuvati vojnu bazu, najopasnije je područje u toj zemlji

Pješadijska jedinica Oružanih snaga Bosne i Hercegovine biće upućena u Afganistan kada Danska o tome odluči. Sve pripreme za slanje jedinice u našoj zemlji su okončane i pripadnici OSBiH su, kako nam je potvrdio ministar odbrane BiH Selmo Cikotić, spremni za odlazak u misiju ISAF (International Security Assistance Force).

- Tačan datum slanja će biti utvrđen u kontaktu sa državnim partnerom, u ovom slučaju Danskom, u zavisnosti od njihovih ciklusa slanja vojnika, kazao je Cikotić.

Osiguranje baze

Sigurno je da se to neće desiti prije oktobra. Ministar veli da je sada na potezu Danska, koja bi trebalo da definiše okvir za upućivanje prve rotacije iz Bosne i Hercegovine u opasnu afganistansku pokrajinu Helmand, gdje će učestvovati u osiguranju baze u kojoj su smješteni pripadnici danske borbene grupe. Na pitanje kakvim informacijama sa tog terena raspolaže, Cikotić odgovara da je "vruće tamo gdje treba da idemo".

- To je sigurnosno najkompleksnije i najzahtjevnije područje u Afganistanu, rekao je on.

Prije desetak dana izvođenjem evolucionisane vježbe, nazvane upravo "Hot summer", te poslije opsežnih priprema urađeno je završno certificiranje jedinice privremenog sastava od 70 pri-

padnika OSBiH za odlazak u mirovnu misiju ISAF. Ovim su zaokružene sve planirane pripreme za slanje naših vojnika na najopasnije mjesto u svijetu.

Iz Ministarstva odbrane BiH je saopćeno da je certifikaciju izvršio ekspertni tim OS Kraljevine Danske, u čijem sastavu je odlukom Predsjedništva BiH planirano upućivanje jedinice OSBiH u Islamsku Republiku Afganistan. Stručnjaci iz Danske su ocijenili da su svi pripadnici i jedinica OSBiH u potpunosti osposobljeni za izvršenje svih zadataka i potrebnih procedura za osiguranje vojne baze Koalicijskih snaga.

- Ovako visoke ocjene osposobljenosti plod su svih dosadašnjih planskih aktivnosti koje je 5. pješadijska brigada, tokom 2009. i 2010, poduzimala u pripremi za misiju ISAF. Motiviranost i osposobljenost za izvršenje misije povezana je sa velikim brojem pripadnika OSBiH, koji su se isključivo dobrovoljno prijavili za izvršenje misije. Pored toga, najveća ocjena osposobljenosti je i rezultat napora i aktivnosti koje su poduzimali MO i OSBiH, a naročito zapovjedništvo 5. pješadijske brigade, saopćeno je, uz ostalo, iz Ministarstva odbrane.

Dobra zarada

Unatoč tome što se radi o veoma rizičnoj misiji, u Oružanim snagama BiH nisu imali poteškoća da formiraju jedinicu. Privučeni mogućnošću da za krat-



U Afganistanu se danas nalazi više 100.000 vojnika

Poginulo više od 2.000 stranih vojnika

Danas u misiji ISAF, pod zastavom NATO-a i komandom američkog generala Davida Petraeusa, sudjeluje 100.000 vojnika, od kojih su dvije trećine iz SAD-a. Procjenjuje se da je tokom devetogodišnje misije u Afganistanu poginulo više od dvije hiljade stranih vojnika (od čega je 60 posto Amerikanaca), a ranjeno 15.000. U prvih šest mjeseci, prema podacima UN-a, život je u toj azijskoj zemlji izgubilo i 1.200 civila. Njih su, u većini slučajeva, ubili talibani, a neki su nastradali i u udarima avijacije NATO-a.

ko vrijeme dobro zarade (za šest mjeseci oko 40.000 maraka), za odlazak u Afganistan se javio veliki broj dobrovoljaca.

No, sudjelovanje pripadnika OSBiH u misiji ISAF imaće važnu političku dimenziju. NATO i SAD su pozdravili odluku Predsjedništva da naša zemlja pošalje svoje vojnike u zemlju u kojoj se vodi rat protiv talibana i nastoji pomoći af-

ganistanskoj vladi. Uz odluku o uništavanju viškova naoružanja i municije u BiH, to je ocijenjeno kao jedan od najkonkretnijih koraka BiH na putu ka punopravnom članstvu u Sjevernoatlantskom savezu.

ISAF je međunarodna vojna misija u Afganistanu, koja je od augusta 2003. pod vodstvom NATO-a. Prije toga je ISAF djelovao

Bajramska čestitka NATO-a

Povodom završetka svetog mjeseca ramazana Glavni štab NATO-a u Sarajevu uputio je čestitku Islamskoj zajednici BiH. Iz NATO-a podsjećaju da je ramazan vrijeme za razvoj kvaliteta izdržljivosti i samokontrole ljutnje i emocija te budenje saosjećanja i solidarnosti sa drugima, naročito siromašnim.

Iznad svega, ovo je prilika da se okrenemo prema Bogu i prirodnim zakonima života. To su kvalitete kojima ljudi svih vjera treba da teže u toku svojih života.

Dani Bajrama su dani radosti, porodice i slavlja. Različitost BiH daje ovoj zemlji jedinstven karakter i snagu. Slavimo i prepoznajemo doprinos svakih od konstitutivnih dijelova zemlje koji dijele zajedničku budućnost mira i prosperiteta, saopćeno je iz NATO-a.

pod mandatom UN-a. Vijeće sigurnosti UN-a je, poslije terorističkih napada na SAD, 11. septembra 2001, procijenilo da je situacija u Afganistanu prijetnja međunarodnom miru i sigurnosti, pa je UN preporučio svojim državama članicama da pomognu operaciji ISAF osobljem, opremom i ostalim resursima.

Daniel OMERAGIĆ

Potočari



Sjećanje na žrtve

Oko 3.000 članova porodica žrtava i vjernika iz velikog broja gradova Bosne i Hercegovine obilježilo je u petak Dan šehida učenjem Fatihe, dove i tevhida u Memorijalnom centru Potočari. Delegacija udruženja, organizacija i Opštine Srebrenica položila je cvijeće na spomen-obilježje, a zatim je upriličen vjerski obred.

"Ovo je naše hodočašće i svako treba ovdje da dođe. Ovo je mjesto najvećeg zločina i genocida u novijoj historiji. Krivci za ovo su još na slobodi, a oni koji su osuđeni, dobili su male kazne", izjavila je Hatidža Mehmedović, predsjednica Udruženja Srebreničke majke.

EUFOR i NATO



Moore posjetio komandante

Jonathan M. Moore, otpravnik poslova Ambasade Sjedinjenih Američkih Država u Bosni i Hercegovini, boravio je u petak u zvaničnoj posjeti komandantu EUFOR-a general-majoru Bernhardu Bairu i komandantu Štaba Sjevernoatlantskog saveza u Sarajevu brigadnom generalu Davidu Enyeartu.

Oni su, između ostalog, razgovarali o odvijanju operacije Althea i iskustvima stečenim tokom te misije, kao i o aktuelnoj sigurnosnoj situaciji u Bosni i Hercegovini, saopćeno je iz EUFOR-a.

Nebojša Radmanović



Telegram saučešća Medvedevu

Član Predsjedništva BiH Nebojša Radmanović uputio je jučer telegram saučešća predsjedniku Rusije Dmitriju Medvedevu povodom terorističkog napada u Vladikavkazu, prenijela je Srna.

U Radmanovićevom telegramu se navodi da najoštrije osuđuje ovaj bezumni nasilnički čin, za koji je uvjeren da neće pokolebati Rusiju i njen narod na putu iskorjenjivanja pošasti međunarodnog terorizma. U terorističkom napadu na glavnoj pijaci u Vladikavkazu u Rusiji poginulo je najmanje 18 ljudi, a više od 100 je povrijeđeno.

Banjalučko muftijstvo



Hvala Oslobođenju

Redakcija Oslobođenja dobila je još jedno priznanje za svoj profesionalan rad. Svečanosti održane povodom Ramazanskog bajrama banjalučki muftija Edhem Čamdžić iskoristio je kako bi dodijelio zahvalnice osobama koje su svojim angažmanom dale doprinos obnovi Ferhad-pašine džamije. Na prijemu upriličenom tim povodom, osim predsjedavajućeg Vijeća naroda Republike Srpske Dževada Osmančevića i gradonačelnika Banje Luke Dragoljuba Davidovića, zahvalnicu za, kako se navodi, svakodnevno i pravovremeno medijsko praćenje obnove Ferhadije i otvaranje Ferhat-pašine Biblioteke u Banjoj Luci, uručena je novinarki našeg lista Gordani Katani.